



Jumat, 8 April 2022
Ogen : Esekiel 34: 26-31



Nggeluh Alu Teneng



Kegeluhenta melala ipengaruhi aspek sekelewetta. Mawen keriahen ukurta, ketenengenta nggeluh ipengaruhi sekelewetta kondusif/teneng entah lang. Adi situasi mendukung tuhu meriah ukurta sabap banci jadi bagi si nisuraken kita. Tapi bicara lang, i je me enggo teridah maka situasi kegeluhenta enda pe banci terancam dengen lanai siakap meriah pe.

Situasi uga nge adi ikatakén nggeluh alu teneng Moria? Adi rukur-rukur kita, pasti sada situasi si dame, la lit sada pe imbangta, suasana teneng la lit *hiruk-pikuk* kendaraan si balap-balapen, situasi segar bas alam si lenga kotor polusi, sehat kita mejuah-juah, suasana pulung ras keluarga i je kita ermeriah ukur, tole ka suasana i ja kita selaku Moria/nande ibahan anakta megah/bangga si akap alu kegeluhenna si ratur dengen la terpengaruh lingkungan si la mehuli entah pe berprestasi ia i bas persekolahen/perkuliahenna. Tuhu melala adina si iukur-ukuri kerna suasana nggeluh alu teneng bagi kata tema sendah. Kerina metedeh ate kempak situasi si teneng, dengen adina banci kita pe ngaloken situasi si bage i bas kegeluhenta.

I bas oratenta sendah ketenengen nggeluh pelin-pelin kerna pasu-pasu Tuhan. Ibereken ingan tading si sikap, udan reh asum perlu, batang kayu erbuah, lanai lit kalak si ngganggu, rubia-rubia lanai jadi musuh, lanai lit si kelihen. Adi enggo bage si ipeseh Dibata, bage me si jadi.

Si enda kerina jadi, adi enggo ngena ate Dibata bangsaNa. Adi pemimpin-pemimpinna patuh man Dibata. Pemimpin-pemimpin bangsa e bagi permakan si adil i bas kegeluhenna. Permakan si erdiate erbanca Dibata tole mperdiateken bangsaNa dengen nehi bagi kai si ngena ate Dibata.